

Šentencija MESOPUSTA „DEVALVATOR“ - 1973. god.

1

AVDITOR

O Bribirci poštovani
Ki ste živi još od lani
Proredila smrt je sela
Puno ljudih sobun zela
Od srca vas sih pozdravljan
Tradiciju ja nastavljan
Med živimi više nije
Pisac lanjske šentencije
No običaj dalje traje
Na mlajimi svit ostaje
Zato ov folj danas čitan
I rožice va vas hitan
V sih mještanih a i gosti
Kih tu ima danas dosti
Čital san ju lanjsko leto
Pak moran i sedanstreto
Da nis danas simo prišal
Mesopusta ki bi višal
Ovdi gori na konuli
Niš ne bite danas čuli
Običaja ja san radi
Evo opet va paradi
Nemojte niš va me hitat
Zač ću sada sača čitat
Se ča ovdi nutri piše
A morebit još i više
Već san se bil ća povukal
I odoru ovu sukal
Sako leto bude svadje
I prigovor saki nadje
Nisan prišal sa auton
Ni asfaltnin ravnin puton
Pronašal san put ja bliži
Veslal barkun kroz Zagriži
Isto koti po Ričini
Samo daj znet oni kljini
Autora san videl Osu
Kako na njen kljeplje kosu
Zač je uprav kot babica
Va nje večer frču dica
No pustimo sada puti
Zač nan ta vrag pamet muti.
TAMBUR

BRANITELJ

Ča van pravi ova luda
Ispred svoga ludog suda
A abukat ja san slavni
Koga znate već od zdavni

2

Primte pozdrav si od mene
Prvenstveno mlade žene
Zač bez njih nan nij života
Se mi se va glavi mota
A kašnje njih si ostali
Ki ste totu doli stali
Ne bojin se ovog suca
Ima krompir mesto srca
Malo ima i pameti
Tribal bi da vozi smeti
Kaša mu se kuha gusta
Zač gren spasit mesopusta
Kriv on nije ni najmanje
Za ovakovo danas stanje
A kij pak kriv sada zato
Toj i meni nepoznato
Napadnimo redon ljude
A mesopust živ da bude
Ča sej v prošlon leti zbito
Nikomu to nije milo
Izglasani su nan lani
i ustavni amandmani
Da se saki njih pridrži
Razvoj bi nan bil i brži
Zajednicu da se dere
Toj već prešlo sake mere
Reć van moran spred parade
Da se danas manje krade
Spomenut van moran i to
Ča je rekal sam drug Tito
Ovako već neće dalje
Pak on svoje pismo šalje
Kako triba da se dela
Va srid grada a i sela
Sakomu se sada krati
Da bez rada se bogati
TAMBUR

AVDITOR

Va domaćoj politici
Još mi ravan nij bil niki
Niti sudac ni branitelj
Ni bilo ki drugi žitelj
Da brat voli svoga brata
Tekovinaj prošlog rata
Lani su se pojavile
Nacionalne mračne sile
Ke nažalost još tinjaju
Va zemaljskon ovom rajju

Videlo sej da ne mogu
 Jugoslavensku razbit slogu
 To najveće naše blago
 Sakomuj čoviku drago
 A va našen se Bribiri
 Nacionalizam ni ne širi
 Mi smo vavik istog soja
 Istinaj to braćo moja
 Morebit je ka budala
 Koj je ta stvar na um pala
 A najviše v gostioni
 Kad Srbin Hrvata goni
 Ili Hrvat pak Srbina
 No toj samo poli vina
 A kad žmulja nij na stoli
 Jedan drugog jako voli
 TAMBUR

BRANITELJ

Pusti jarče sada bratstvo
 Nacionalizam i Hrvatstvo
 Nego sada veruj meni
 I budimo Jugoslaveni
 Ki su uzor celon svitu
 Zato fala drugu Titu
 Da opet nij bilo njega
 I lani bi bilo sega
 Da nij lupil on po stolu
 Sačaj bilo na pomolu
 Ondaj sotin se propalo
 Pirker, Savka i Tripalo
 Teroristička isto grupa
 Prošlaj k vragu š njimi skupa
 Kaj šla bila skroz va Bosnu
 Partizansku i ponosnu
 Tuj ta banda uništena
 I plaćenaj skupa cena
 Celi svit se oporavlja
 Dogovor se novi spravlja
 Da ne bude više rata
 Ki već vragon tin barata
 Kašnje smrti Kenedija
 Punoj gore nego prija
 I Njemački lider Vili
 Sadaj proti sake sili
 Sa svima on pregovara
 I Njemačku novu stvara
 Ka se neće više mlatit
 Čovječanstvu vjeru vratit
 Sere samo još Merika
 Više zemlja druga nika

Pri kraju j rat va Vjetnami
 Merikanci vele sami
 Samo očel to bit tako
 Pogodit to nij baš lako
 TAMBUR

AVDITOR

Pulitikun se ne bavin
 Običajen ja se gnjavin
 Ki pomalo već jenjava
 Prit mu oće smrtna slava
 A da pak nij nogometa
 Ne bi ga bilo za dvi leta
 Se se kvragu komercijalizira
 I srid drevnog nan Bribira
 „DEVALVATOR“ i tu vlada
 A i banka j na srid grada
 Filijala Jugobanki
 Da nan budu bolji danki
 Sada triba da se štedi
 Zač nan Dinar pićo vredi
 A čoč šparat ča ne valja
 Dinar se već cistun talja
 Nete ga već niti dica
 A bome ni pekljarica
 Va modi su milijoni
 Ki se voze v kamijoni
 Štampaju se bez prestanka
 A nima jih čak ni banka
 Kakove su pak to pare
 Kot harta čin rit se tare
 I kako se opet čuje
 Se po redu poskupljuje
 Šesnajsti put va von leti
 Čoće to bit Bože sveti
 A v birtiji ki pak pije
 Pivi vina i rakije
 Ča zaradiš za jednu uru
 Ne moreš zvat sebi turu
 Milijon je moje ženske
 Kubik vodi već radenske
 TAMBUR

BRANITELJ

Ča pravi ova pijandura
 Kuliko košta pića tura
 To ne umi ni da zbroji
 Ov telčina ljudi moji
 Ča mi ovin sada piša
 Matamatika to je viša

Treti koren od Dinara
 Zide jedna Para stara
 Ne nigdanja ona šupa
 A ka j bila fanj i skupa
 Toj kriv ova bagatela
 Vikendice redon dela
 Jednu v Puli drugu v Riki
 A tretu va Dubrovniki
 Pak onda na Boduliji
 Kadij teren jeftiniji
 I va našoj lipoj gori
 I pod Mikulj čaj na mori
 V sakon mesti ciment miša
 Valjda ima tog sitniša
 Dvisto hiljad kad dobije
 Od šest milijonih kuću zije
 Ali čuj me grdi suče
 Na svoj malin on vodu vuče
 Mislin blizu j to istini
 Va ton posli ni j jedini
 Ti si isto va toj kaši
 Znadu zato ljudi naši
 Mesopusta niš ne krivi
 Triba i on da nan živi
 Nij se bavil zidarijun
 Malo više kurbarijun
 Zaminil je politiku
 Za nu žensku onu niku
 Zato j sada malo niži
 Za pet školjic na kajži
 V celoj zemlji nij dinara
 Niti nova niti stara
 Čoće ov naš narod tužan
 Odreda je saki dužan
 Ki se to pak potražuje
 Nigdir o ton se ne čuje
 Delaju se u nas brodi
 Za se zemlje priko vodi
 I opet smo va gubitki
 I va vodi jako plitki
 V koj dojedan grad kopore
 Kako umi i kako more
 Rekli su mi i turisti
 Da j i u njih slučaj isti
 Saki čeka dotaciju
 I ki siju i ki ziju
 A za cistu do Zagreba
 Formular popunit treba
 I si drugi razni zajmi
 Ajme brate samo daj mi
 Obzira se zajednica

Isto kot i pići dica
 Digneš va non škartočići
 Kupčić bečih jako pići
 S tin misec dan moraš žderat
 Ili će te vrag oderat
 Dite veli da bi lučku
 Drugi opet- daj za Učku
 Onda pride skroz iz sreza
 On beli ček od poreza
 Kad podmirin se te daće
 Ko da nisi prijel plaće
 Pak posudiš u suseda
 U Merikanskog koga deda
 Kufertica j jako tanka
 Čoće nan ni Jugobanka
 Ni knjižnica a ni pošta
 Kad se jako skupo košta
 Dvi tri leta moraš šparat
 Onda će te vrag prevarat
 Ov mesopust „Devalvator“
 Za narod je pravi zator
 Ali moran ga ja branit
 Ki mu oće dicu hranit
 Ako sudac ga zapali
 On to oće mi se fali
 Sedmero on ima dice
 Na teret ove zajednice
 Pa ako ga pak ubije
 Bit će gore nego prije
 Ako ova vijest je tačna
 Dica su mu sa vanbračna
 Zač mesopust kadi stigne
 Samo vajer nogi digne
 Nij ni čulo ovo zvjere
 Kontracepcijske ča su mjere
 Zatoj puno te dičini
 Ne zihaje dokli fini
 I ženske se manje boje
 Pak mirnije puno stoje
 I ne frču sa kopiti
 Kad njin prideš blizu riti
 Se su van to okolnosti
 Da on ima dice dosti
 A još jih je ki tu dišu
 Samo na njen se ne pišu
 Muž ga primi kot i svoga
 Misli da j to dar od Boga
 Zato ova bagatela
 Na tujih ženah dicu dela
 TAMBUR

AVDITOR

I v Bribiri su akcije
 Kot su bile nigda prije
 Vavik ljudi taškun švere
 Niki vrag se stalno bere
 I za vodu i za struju
 Redon vavik prikupljuju
 Onda kola pak mrtvačka
 Da se mrtvac puten tačka
 Počeli su srid Bribira
 Skupa Tome i Tus Mira
 Ostale su još njen Štale
 Ke baš nisu jako male
 Jedan žmuljić v sakoj kući
 Težak život putujuć
 Torbu stresli su na stoli
 Va kašteli u Nikoli
 Poštenjačine su oni stare
 Nij falilo niti pare
 Tu su mu to se predali
 I na Vrbu šebetali
 Mira j zletel na ne stubi
 Kraj šekreta poli Ljubi
 Tu j i mesto takvon gostu
 Tome j uspel proć uz Kostu
 Mira j zaspal tu na zidi
 Kot mesopust na katridi
 Tribale su prave dica
 Najprvomu – mu kolica
TAMBUR

BRANITELJ

Puno ljudih nan je vani
 Mnogo više nego lani
 Kad na vikend pridu simo
 Redon va nje si buljimo
 I gljedamo kot siroti
 Va postoli i v kapoti
 I v auto čaj kot karak
 Košta blizu dvisto Marak
 Ki se vrne pak z Afriki
 On je ravan Mati Diki
 Zač on svoju firmu drži
 I prevoznik je najbrži
 Mesopust je kriv i Marku
 Ki j bil prošal va Švicarsku
 Kašnje igre na Lukovi
 Dom muj tamo sada novi
 I lipo sej tamo snašal
 Samo ne znan jel ku našal

A sada se i to čuje
 Da i Ane će putuje
 Ona će poč to ispitat
 I se ženske van pohitat
 Mislin da mu nij kot prije
 Va glavi do kurbarije
 Tamo j vela disciplina
 A i puno j manje vina
 Vrnul se j i Mata Cistar
 Vridan čovik jako bistar
 I s manun se dosta druž
 Samo mi se sada tuži
 Da oće bit vavon štivi
 V kon su redon ljudi živi
 Neće više z našeg kraja
 S Viševicun se pogaja
 Zanje sada posal dela
 V Dragaljini nasrid sela
 Šal je vidit jednu sredu
 Kako stvari s poslon gredu
 Va tu firmu svoju staru
 V kuću Branku tehničaru
 Nič mu se po glavi vrti
 Gre ga pitat za nacrti
 Ulovil je on za kvaku
 Kot se gre va kuću saku
 Ča delate on naziva
 A v kući nij krsta živa
 Pak vrag Mati mira ne da
 Sigurno su u suseda
 Istina j to ljudi gola
 Sel je Mata na srid stola
 Popušil je dva cigara
 Da nij bilo gospodara
 Ondaj zišal van na vrata
 V menzu Anu pitat Mata
 I doznal je tu od Ani
 Prošli su prve šetemani
TAMBUR

AVDITOR

A sada su ljudi moji
 I poli nas kauboji
 Ki čoviku srce dirnu
 Kad v kolibu pojdu mirnu
 Još mi se i sada šmrca
 I teško mij okol srca
 Zač je tamo jedan dasa
 Prebil sedan naših asa
 To su bili nan najjači
 Mesopuste niš ne plači

Da si šnjimi ti bil tamo
 Ča bi bilo to već znamo
 I ako si ti od slami
 Bolje da nisi bil s nami
 Maher našal se je pravi
 Nij zafrcal ni rukavi
 Prvi j zletel ja se čudin
 Van po zraku Ive Rudin
 Jerkov Ive za njin drugi
 Drito pod zid va ostrugi
 Treti j zletel Ivan Jurin
 Kot i da ga nosi burin
 Onda j kako ljudi prave
 Na šaku naletel Slave
 Toga mij pak žal čovika
 Zač on nije bena nika
 Nebi zaklal niti janje
 Zavih drugih više manje
 Ajme meni majko moja
 Kad je na red dospel Voja
 Odletel je koda pliva
 Vidistel ga kadi živa
 Onda j ostal skroz bez zraka
 Naposljetku i sam Raka
 Sedmi j zaspal srid kolibi
 I na kopni sličan ribi
 Nis siguran jel i Djoka
 Pipal slivu ispod oka
 Mislin da mi se j pofalil
 Na dobu peti daj potpalil
 Tako se j to i finilo
 Zavo moje društvo milo
 Mislin brzo tamo nete
 Baren do osandesete
 TAMBUR

BRANITELJ

I ako j već fanjski starac
 Javil mi se j Ivan Parac
 Reć van moran sada valje
 Skroz Zagreba pisma šalje
 Na adresu autora
 Pa se ga spomenut mora
 Misli su mu v rodnon kraji
 V mesopusti i običaji
 Napisal je puno toga
 Mimo ovog štiva moga
 Pročitat ću samo malo
 Ča mij ovdi nutar stalo
 „Sebičnjak“ muj on dal ime
 Da se zove ove zime

Ni to ime nije loše
 Za nih pare ki nan troše
 I za onih drugih škrti
 Ki su sami vase svrti
 Sad ću da van i otpivan
 Čaj poručil tetac Ivan
 Ne moren pročitat se to
 Neg san klal to na rešeto
 Pak je ono čaj ostalo
 Kroz sivalo doli palo
 Sada čujte ča on veli
 Za ov lipi grad naš beli
 Nikuliko ovih redi
 Jeko puno danas vredi
 Dajte Barcu kitu cvijeća
 Viševica sada veća
 Pust je Bribir nema krava
 Još išćete svoja prava
 Nima mlika nima telca
 Ni u Mati Pogorelca
 Toj kitica teca Parca
 I za kravi i za Barca
 Drugi retki san ostavil
 Nis je hitil san je spravil
 V šentencijskon si su stili
 Napisani v pismi bili
 Dosta se to lipo slaže
 Tatac Ivan niš ne laže
 TAMBUR

AVDITOR

Da vidimo Bože sveti
 Ki vrag je va nogometi
 Sada su nan naši asi
 V podsaveznoj prvoj klasi
 Pak mi niki ljudi prave
 Daj zato kriv trener Slave
 On je sada trener stalni
 A bome i profesionalni
 Kot čaj Zebec va Hajduki
 On je to zel v svoje ruki
 Kad su bili v ligi dolnjoj
 Se na bazi dobrovoljnoj
 Prave sada ljudi mnogi
 Bilo j puno više slogi
 A kad pojdu pak va zonu
 V koj je „Nehaj“ baš va onu
 Čini mi se ljudi koda
 Nete dobit jednog boda
 Zato triba kondicija
 Pićo veća nego prija

Nij potribno veće znanje
 Danas zato više manje
 Utakmice suci sude
 Kako reku tako bude
 Rezultat skroje ajme meni
 Baš prvi dan još na ženi
 Onda jedna grupa manja
 Igrališćen jih naganja
 Ne znan na kon klub je mesti
 Čini mi se kodaj šesti
 TAMBUR

BRANITELJ

Grom te božji tu utukal
 Lih si ta dres sebe sukal
 Podbijal si nan kopački
 Nikad nisi dobil znački
 Dva si šćapa mesto pranjgi
 Imel tamo na golštanjgi
 I branil si va šarići
 Duješini pod borići
 Sada nan je tu Blatuša
 a ki oće neka sluša
 Voda nan se sporo suši
 Va stadioni na Blatuši
 Pilotinun se posiplje
 Kadi badnješ sagdi škriplje
 Barac je finil višu školu
 Sada pelja karijolu
 Na ton velon gradilišći
 Kot manival da je nišći
 Drugi retko tamo pridu
 Zač vole poč na Kantridu
 Kadi teren ča se ruši
 Koti u nas na Blatuši
 Ravnica se ova lipa
 Pilotinun sad posipa
 Kad je kiša malo jača
 Ne pušća je ilovača
 Ondaj voda do kolena
 Lopta bude jako lena
 Pliva po toj površini
 Kot na Žagi va Ričini
 Kada zidu dvi ekipi
 Sjaje dresi njin se lipi
 Jedni beli drugi plavi
 Ovisi o šefu Slavi
 A va drugon već minuti
 Obadvoji budu žuti
 Zač i tuji a i naši
 Okuplju se va toj kaši

Pred Boru j baš lopta pala
 On uteče ona j stala
 Na livo krug se mora vrnut
 Da se v loki neće zvrnut
 Triba loptu kiškat jače
 Kad vrag neće da odskače
 TAMBUR

AVDITOR

Pusti sada mi dičinu
 Loptu vodu i Ričinu
 Kako pak ta vrag se zove
 Kada lovci srni love
 Od lovca san baš čul Rajka
 Da se ta vrag zove hajka
 Kad se z lova s puškun vrne
 Va mesnicu on zavrne
 Pak v lovačkon tomu ruhu
 Kupi kilo baš za juhu
 Pak lovački ov naš dasa
 Pun patronih okol pasa
 Da mu obed bude friški
 Napunjeni si su fiški
 Tribat ote drugi puta
 Kad va šumu on zaluta
 Nigda bude malo življe
 Kad na svinje pojdu divlje
 Tada biže pod jelvići
 Koti da su dica pići
 I vrnu se večer kasno
 Zanimanje to je krasno
 K vragu da gre i ta srića
 Večer kolju Petešića
 Vepar ima grdnu njušku
 Drito gljeda civ i pušku
 A more se i to sitit
 I kroz gaće drob van hitit
 Srna j dobra kad se speče
 Samo ta vrag brzo teče
 Teško j va nju metak spravrit
 Skoro lakše juj udavit
 Lakše j lovit pitomije
 Na ne lipa nogi dvije
 TAMBUR

BRANITELJ

Vite ljudi ovo prase
 Niti jedne neda na se
 Nevolje od celog svita
 Na mene jадnoga hita

„DEVALVATOR“ soldi nima
 Mirovinu maću prima
 Već je blizu simitira
 Zač se dinar devalvira
 Lipi dinar naš lateni
 Na najmanjoj sad je ceni
 Ovi naši isukrsti
 Ne valjaju već ni v Trsti
 Lani su još nič vredili
 Ovi beči ljudi mili
 A sada su kot i peče
 Argentinac kako reče
 Ako j to naš veli propust
 Nij za to kriv ni mesopust
 A čaj krivo ne znan ni ja
 Tribalo j promislit prija
 V svojoj zemlji mi smo stranci
 i Njemci i Merikanci
 Mesto lojtar v sakon seli
 Sad su Princi i Opeli
 I se stvari od luksuza
 Na oko mi već gre suza
 Redon rastu vikendice
 Čoće to bit z naše dice
 TAMBUR

AVDITOR

Makni sada se spred mene
 Da osuda dalje krene
 Zabil san van mi se čini
 reć nič i o omladini
 Disko klub nan već ne dela
 V Poduljini na dno sela
 Poduzete sad su mjere
 Z vojske j prišal Picljin Pere
 Zgljeda zato j već pripravno
 Na Rudi ono brdo ravno
 Triban još nač striptizeti
 Veli Pere va bifeti
 Kako oće klub poslovat
 Ja ga neću kritikovat
 Kad se dela okol riti
 Neće bit va defeciti
 „DEVALVATOR“ gre poginut
 Baš gren sablju v njega rinut
 (udarac)
 Vi ki ste malo dalje
 Vite kako j umrl valje
 Krivac je u potpunosti
 Argimentih iman dosti
 TAMBUR

BRANITELJ

Ča gren sada ljudi mili
 Si ste ovdj s manun bili
 Momenat mi gre na ruku
 Da pročitan oporuku
 Najprvi su mi se čini
 Kapetani v ostavini
 Si su nan tu dečki mladi
 Prvi puta va paradi
 Šnjimi j Zlatan a i Mile
 Odule ih ne bi vile
 I bolji su kapetani
 Dobri kot i lani
 Ovo leto s v paradi
 Se od reda dečki mladi
 Ostavlja njin puno sriće
 Paletuške jako miće
 Da običaj još tiraju
 V bubnji tuku i sviraju
 Počekajte malo neka
 Da nič pitan Jožu Peka
 Zač je dosta on pomogal
 Puno više nego j mogal
 Ima smisla a i volje
 Da nan ovo teče bolje
 On spada va selo Štale
 Pitura mu majstor Lale
 Kuhinju mu on pitura
 I kad počne malo dura
 Neće Joža niš se silit
 Zač je Lale počel bilit
 Istog časa kad je prišal
 Nič je va no japno smišal
 Bilaj toga puna brenta
 Jel popela jel cimeta
 Pak je sotin kot od šale
 Zidi bilil majstor Lale
 A kad dobro jej nabalil
 Va bufet se j doli spravil
 Tri dani se j tamo slinil
 Kuhinje nij Joži finil
 Onda j Joža mimo muki
 moral pinel zet va ruki
 Bili Joža kot od šale
 Stiže v kuću majstor Lale
 Pripeljal ga j Šipko Jože
 Bil je moka ispod kože
 I onda se slači Lale
 Pred kuhinjun nasrid sale
 Radna roba da mu dura
 Dokli kuću popitura

Za ov slučaj ni ne marin
 Kvragu j prošal i žveljarin
 Odnosla ga j valjda bura
 Kad je prošla inventura
 Vajer Lale j ruki digal
 Kad ga j Joža doli stigal
 Z jednog žepa špija boca
 A va drugon ura škljoca
 Tako Joža kraj majstora
 Sam pinelon farbat mora
 Oćel peć kruh i bubice
 Ili sidit poli dice
 Ako gre još i piturat
 Ne znan dokli oće zdurat
 Se muj ovo radi šale
 Napitural majstor Lale
 TAMBUR

AVDITOR

Mogal bi se ti ća maknut
 Zać oću i tebe smaknut
 I niš mi se tu ne slini
 Okol ove ostavini
 Dorasal još tomu nisi
 Poli mene si su spisi
 Čaj najbolje zimljen sebi
 Da me ki pretekal nebi
 Ostavil je branitelju
 Stara žrvnja ka ne melju
 Bogami ga j branil lipo
 Čoće tele kad je slipo
 Moderna j već i parada
 Ka nan šveri okol grada
 Se su nan to pići dica
 V kih očeva još je žica
 Ostavljan njin zać su mladi
 Trobojnicu od paradi
 I kletu ju neka nose
 Ispod ove duge kose
 Veliboru v zadnjoj tuzi
 Ostavil je kuju Suzi
 Tako ovdi nutri veli
 Pelja ju mrkat va Opeli
 Jednon kucku gori v gradi
 Još ni danas nima mladi
 Kupila je kuja sebi
 I tableti antibebi
 Pametnij j nego prija
 Zato nij ostala brija
 TAMBUR

Sada redon ljudi mili
 Soj paradi dari dili
 Ivi daje on Mateli
 Jedan bocun i to veli
 I Serž isto neka bira
 Ostavlja mu kantu čmira
 Zać s auton duro triska
 Neka trogar jaće stiska
 Ljubi daje Antoniću
 Od najlona vriću piću
 Kad mu pride sila viša
 Da v paradi va nju piša
 Sličnu j nuždu vršil tešku
 V Austriji hodeć v Češku
 Vlasteliću teca Osi
 Valje neka drugu prosi
 Evo ovdi nutri čita
 Z postilje ga žena hita
 Kad se vrne iz paradi
 Ov dobri muž Jože mladi
 Fricu lipi savet daje
 Neka pazi kadi staje
 Dobit oće va von leti
 Jedan račun za bloketi
 Padobran mu novi daje
 I neka mu dugo traje
 Kad bu hodil va Podskoči
 Neka pod zid na njen skoči
 Velu borbu s Ivun vodi
 Još je dugo do slobodi
 Ovdi otel nij napisat
 Kad primirje te potpisat
 Toj napeto kot Vjetnami
 Tako prave oni sami
 Jedan drugog skoro ubi
 Zadnji meć je bil u Ljubi
 Završil je va kantuni
 Ive j bil va nokdauni
 Onda totu ljudi moji
 Marica Ivi do osan broji
 TAMBUR

Na kraji ove pantomine
 Ideja mi jedna sine
 Da pozdravin firme moje
 Uz običaj ki nan stoje
 I vavik su nan na ruku
 Sih je on klal v oporuku
 Onih ki su nan pomogli
 Kuliko su dat nan mogli

Društvu nan za običaje
„Jugobanka“ pomoć daje
Ta nan pomoć puno vredi
Društvo u nje soldi štedi
Isto tako pivovara
Ni ovo leto nij bez dara
Onda druga poduzeća
Ona mala a i veća
I si naši obrtnici
Daju prilog ovoj dicit
Autoru j dal još lani
Jednu pundžu u Mirjani
Isto firma od Jurčića
Ku još prati dobra srića
Kada pasa noći pola
Šegrti mu zamu kola
Nisu baš ni oni ludi
Zač se Dragan kasno zbudi
TAMBUR

Za danas je ljudi dosta
Ja pozdravljan sakog gosta
I sih naših na von sviti
Na običaj ki se siti
Da se zna da vavik traje
Društvo za ve običaje
Kletu će bit još i bolje
Baren zato ima volje
Na rastanki sto put fala
Sej to bila samo šala
A sin ženani ke pak tu su
Šaljen jednu lipu pusu
TAMBUR

Autor: Joža Ugrin

Avditor: Franjo Miculinić
Branitelj: Ivan Miculinić

